



TAPAK 10

Rajasthan Royals-i director of cricket asütsü Sangakkara shim

TAPAK 8

Navalny busema longkak aiter nisung 3,000 shi puogo



VOL. XVIII NO. 101 (ADOK 101) DIMAPUR

TENTONÜ (MONDAY) AENJETI (JANUARY) 25, 2021

₹ 5.00

Steering Committee züngsem Hutovi Chishi-i jangjashitsür

Dimapur, January 24 (TYO): Steering Committee nung Convener mapa toktüsü atema social media nung osang tiyazü prokshir ta Executive Member aser taoba Steering Committee, NSCN Convener, Hutovi Chishi-i tanü metetdaksüogo.

NSCN indang Steering Committee nung teti mapa melentepa inyaker saka IB (Intelligence Bureau) ajanga tasa atonga NSCN anemer kari osang tiyazü prokshir, ta Hutovi Chishi-i sangdong ka nung ashi.

"Collective Leadership-i kü nem

Steering Committee, NSCN nung Co-convener aser Convener inyaksü maongka agütsüba atema kanga pelar" ta paisa ashi.

"Collective Leadership ajanga mapa balala lemkütsür aser NSCN-i kibong ka ama tetsükdaksü ajak ajangteta aruogo. Naga yimtenren mapa atema NSCN-i maneni kibong ka ama inyaksü" ta Hutovi Chishi-isa metetdaksü.

Ni NSCN züngsem ka ama inyaka arudang iba ama mapang ajuruba atema kanga sasa bilemer, ta paisa shisem.

Amit Shah-i Assam semdangdang wako tanak atsüket

Guwahati, January 24 (Agencies): Union Home Minister Amit Shah-i Deobarnü Assam semdangdang All Assam Students' Union (AASU) züngsemtemi tesem balala nung lungkak aita sentongtem agi aser wako tanak atsüket.

Sadiya nungi Dhubri tashi AASU züngsemtemi sentongtem agi saka police-i parnok noktang. AASU-i ashishitep aketba Citizenship Amendment Act (CAA) anema lungkak ait.

Guwahati nung AASU züngsemtemi headquarters Swahid Nyas nung wako tanak atsüketa liasü.

AASU züngsemtemisa Citizenship Amendment Act züluba poster tem mi agi rongdok.

Ajisüaka, AASU züngsemtemi Guwahati kübok tangalen lungkak maitdaksütsü atema police-i noktang.

Külen, Gohpur nung wako tanak kar atsüketba sülen police aser AASU züngsemtem tsüingda raratepba osang angazükogo.

Iba mapang police-i AASU züngsem aika apu aser Gohpur Police Station-i anir ao.

AASU-i CAA anema tanü agi anogo asembuba lungkak aiter. Parnoki January 22, 2021 nungi CAA anema lungkak aitsü tenzüik.

Honibar January 23, 2021 nü Prime Minister Narendra Modi-i Assam semdangdang AASU züngsemtemi Assam kübok tesem balala nung badge tanak khaloker aser mask enoker CAA anema lungkak aita liasü.

CAA agientsü akhangba dak alia AASU-i ozüingi memelaba Bangladeshi nung puteta meyipa yoktsü aser draft Environmental Impact Assessment (EIA) 2020 notification agientsü akhanger.

Dimapur nung R-Day atema traffic tetuyuba agütsür

Dimapur, January 24 (TYO): 72 buba Republic Day 2021 benjung amongtsü aliba ajanga Dimapur district nung traffic tetuyuba kar agütsüogo.

Republic Day 2021 benjung matem tashi Tragopan Police Point nungi Newfield Check Gate tashi gari mesenzükdaksütsü, ta ADCP (Crime) cum Public Relation Officer, Dimapur-i metetdaksü.

Tragopan Police Point/New Field Check Gate nung 'Z' aser 'Y' category car pass alirtem dang yoktsü aser DDSC stadium telungi 'Z' category car pass alirtem dang

aitdaksütsü, ta paisa ashi.

Iba mapang garitem Khermahal junction ajanga Island colony leni yoktsü. Medical emergency tem anti sabotage atema mita reprangba sülen senzükdaksütsü, ta Dimapur Police ketdangsürisa metetdaksü.

January 26, 2021 nü Dimapur district kübok inter-state/inter-district entry/exit points ajak (Dellai/NewField/Chumoukedima Check Gates) nung anepdang 6:00 ako nungi Republic Day 2021 benjung matem tashi garitem mesenzükdaksütsü, ta paisa ashi.

Kaketshirtemi PM indang Box nungi R-Day parade reprangtettsü

New Delhi, January 24 (Agencies): Central Board of Secondary Education (CBSE) class 10 aser 12 exams aser university nung toppers-i January 26 nü Prime Minister indang box nungi Republic Day parade reprangtettsü.

"Linük nung takok tajung anguba kaketshirtemi Prime Minister indang Box nungi Republic Day 2021 parade reprangtsü osang tajung lemsateper. Kaketshirtemi Minister of Education, Ramesh Pokhriyal Nishank den ajurutepa sensaksemtsü maongka angutsü" ta Ministry of Education-i metetdaksü.

Kaketshirtem nem tenüngsang

agütsüba kulikakettem agütsütsü, ta Ministry-isa ashi.

Education Ministry-isa school kaketshirtem atema online ajanga essay, quiz, poetry tetoktepbatem ayonga agitsü. Item tetoktepba ya Hindi aser English oshitem nung agitsü aser January 30, 2021 nü tembangtsü.

COVID-19 wara ajanga Republic Day benjung amongba nung temelenshi aika bentsür aruogo.

Taküm sentong nung motorcycle nung mener stunt balala sayuba malitsü aser yaküm nisung lakh 1.25 shi adenshiba nungi takümbo nisung 25,000 dang adenshitsü latetogo.

NCD indang councilor senden ayonger

Dimapur, Aenjeti/January 24 (TYO): Naga Council Dimapur (NCD) indang councilor senden ka January 27, 2021 anepdang 11:00 ako nungi tenzüka Council Conference Hall, Nyma Lotha Road nung amentsü, ta Naga

Council Dimapur indang tongti zülur, Thsapongkyu Sangtam-i sangdong ka nung metetdaksü.

Iba senden nung councilor ajak medema arua adentsü metetdaksür, ta sangdong ajangasa ashi.

Aluyimertemi R-Day Parade nung timtem magütsütsüla: Delhi Police



Aluyimertemi Republic Day nung tractor rally nung shilem agitsü atema Delhi-i aodang agiba noksa angur.

New Delhi, January 24 (Agencies): Centre-i latetba farm laws anema noktakba aluyimertemi Republic Day nü tractor rally alitsü temelaba nguogo. Ajisüaka, Delhi Police-i parnok nem tenokdangba aika agütsüogo.

"Aluyimertemi Delhi telungi aittetsü saka Republic Day parade nung timtem magütsütsü" ta Delhi Police-i Deobar nikongdang metetdaksü.

Rajpath nung Republic Day parade agiba sülen tractor rally ji alitsü ta parnokisa ashi.

Aluyimertemi kilometer ishika

atema Delhi telungi aittetsü aser tesem kar shima aliba len nungi aotsü. Iba rally atema security akangkanga agütsütsü aser Republic Day parade atema mapa lemkükja alirtem nema iba atema mapa lemküktsütsü, ta Delhi Police-isa metetdaksüogo.

Centre sorkari Republic Day nung aluyimertemi tractor rally alitsü anema noktak. Iba ya linük atema maaksü asütsü ta Centre-i ashi saka Supreme Court-i iba ya "law and order" onük lir anungji Delhi Police-i telemetba agiang ta tetuyuba agütsü.

Aluyimertemi ozüingi melaba ama lungkak aittetsü temeten lir ta Supreme Court-isa taoba mapang shiogo.

Singhu aser Delhi den arrtsüa aliba tanga tesemtem nung aluyimertemi ita ana jungnua lungkak aita arur.

Centre den aiben ajurutepa olemtepaka tatembang kati marutetba sülen aluyimertemi tractor rally alitsü telemetba agi.

November 26, 2020 nungi aluyimertemi "Delhi Chalo" sentong tenzüiker January 26 nü ita ana ajungba tenüng nung parnok tractor rally alitsü lemtet

COVID-19 Nagaland: Nisung ka dak danga meputet; 1 taneptsü angu

Dimapur, January 24 (TYO): Deobarnü Nagaland nung nisung ka dak danga Covid-19 aliba meputet aser nisung ka taneptsü angu.

December 27, 2020 nü Nagaland nung nisung ka dak danga Covid-19 meputetba sülen tanü-a kasaji ajangshiogo.

Iba osang ya tanü Nagaland Health & Family Welfare minister, S Pangnyu Phom-i metetdaksü.

Tanü Kohima nung nisung ka taneptsü angu aser iba ya züngsema taneptsü angur ajak agi nisung 11,743 lir, ta Health & Family Welfare Director, Dr. Denis Hangsing-ia ashi.

Tang tashi nung Nagaland nug COVID-19 aliba puteter nisung 88

süogo aser 142 tanga state temi ao, ta paisa metetdaksü.

District balala nung COVID-19 putetba: Dimapur (6,465), Kohima (3,777), Mon (605), Peren (504), Tuensang (245), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,076 rongnung Traced Contacts 4,980, armed forces personnel 4,667, tanga state tem nungi arur 1,857 aser Frontline Workers 572 lir, ta Dr Hangsing-i ashi.

District balala nung tang anepalurtem: Kohima (49), Dimapur (41), Mokokchung (12) aser Mon (1).

"Tang anepalurtem rongnung

nisung 12 dak shirangba yimya terara lir aser 2 oxygen agidar. Nisung 87 dakbo shirangba yimya kecha mali" ta paisa shisem.

Taneptsü angurtem: Dimapur (6,291), Kohima (3,670), Mon (593), Peren (504), Tuensang (243), Mokokchung (171), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,23,999 tendangogo. RT-PCR ajanga sample 72,967, TrueNat ajanga sample 37,064 aser Rapid Antigen Test ajanga sample 13,968 tendang" ta COVID-19 bulletin nung metetdaksü.

Covid sülen Northeast-i anir India renloktsü: DoNER minister

Shillong, January 24 (Agencies): COVID-19 wara süitemba sülen Northeastern region ajanga India renlokba len anitsü ta Union DoNER minister Dr Jitendra Singh-i metetdaksü.

Deobarnü Shillong nung North Eastern Council (NEC) 69 buba plenary session tembangba sentong nung Dr Jitendra-i iba ya ashi.

Union home minister Amit Shah-i NEC indang 69 buba plenary session tenzüikja liasü.

Anogo ananü NEC session nung Northeastern region atema terenlok mapa inyaksüba sentongtem benoka lemsatep aser tang tashi inyaka aruba osangtem metetpelaa liasü.

"Prime Minister Narendra

Modi-i Northeast region renlok daksütsü aser tanga state tem den kasa kümdaksütsü atema alizüing lir ta" Union minister of state (independent charge) for Development of North Eastern Region (DoNER), Dr Jitendra Singh-i metetdaksü.

Tesüiba küm 6-7 tsüingda PM Modi lenisüba kübok Northeast ya terenlok lenmang nung jajar aser iba ajanga linük ajungai Northeast dak temolung agütsüba angateter, ta paisa ashi.

Nisungtemi kanga imlar aser PM Modi-i tang ajangteta aliba nungi talila ajangzüknür. State ajak aser ministry temi bendanga agütsüba ajanga tarutsü nung Northeast-i tetsükdaksü ajak ajangteta aotsü, ta Dr Jitendra-isa

ashi.

"Centre sorkar ministry aser department tem nungi ketdangsürtemi ashiba onüktem Dr Singh-i kanga junga angaogo aser pai ministry balala nungi secretary tem dang Northeast state tem akokba tashi yaritsü mepishi" ta DoNER ministry-i metetdaksü.

"COVID-19 sülen Northeastern region ya shishilembadak tesem ka asütsü aser rongsenkettsüng maparen nung aou ya kanga dang tongtipang tongshi ka asütsü" ta Dr Singh-isa ashi.

Dr Jitendra Singh-isa state sorkartem dang ministry balalai agütsüba senotsü timi amshitsü aser nisungtemi scheme balala indang tajangzüik ngudaksütsü atema ayongzüik.

Assam Rifles temi sentong balala ayongzüka agi



Dimapur, Aenjeti/January 24 (TYO): HQ IGAR (North) kübok Assam Rifles, Mokochung Battalion ajanga Netaji Shubhas Chandra Bose sor küm 125 ajungba anogomung nung Parakram Diwas amungdang India nüjiso bushiba mapang Netaji-i shilem agiba indang lecturer agütsü aser pa indang documentary tem Mokochung district tesem ajungalen sayua liasü.

Linük atema Netaji-i takum bendanga agütsür masetshii

tenzüka bilemteta aser akhum agüja item sentong ya ayongzüka liasü. Region nung aliba nüburtem, talisa lanurtem dang Netaji-i inyakba ama nungdakba mapang tasü ita nokdaksü ajungmesoa, aser parnok molungjang nung linük meimba molungsentsü agütsütsü nükjidong nung sentong ya ayongzüka munga liasü. Iba sentong nung lanur 58 tashi arua dena liasü.

HQ IGAR (N) kübok Assam Rifles, Kiphire Battalion

ajanga civic action initiative kübok Free Movement Regime ajanga melaba ama Pungro jila nung awareness sentong ka ayongzüka liasü.

Iba sentong nung Free Movement Regime indang teyari agirtem dang sentong balala aser teinyaktsütem indang rateta shia liasü.

Iba sentong nung village council chairman aser Head GB 23 arua dena liasü. Iba sentong ya social distancing yimya shidak amshia agi.

Arunachal lanur dang sepai nung adentsü ajungmeso

Guwahati, Aenjeti/January 24 (Agencies): Indian Army ajanga Arunachal Pradesh nung aliba Shiyomi district kübok Menchuka nung 'Know Your Army' Mela ka ayongzüka liasü.

January 26 nü Republic Day anogomung nung shilem ka ama iba anogo ana mela ya Honibarnü tenzük.

Civil society tem nem armed forces indang awareness

agütsütsü aser lanurtem yangji dendaktsütsü ajungmesoa iba mela ya ayongzüka liasü.

Iba mela nungya nok-o-nü aser hadir tasentem tabu balala sayua liasü.

Mitkartemi iba sentong nung nüburtem dang linük indang mitkar tashi aser technology tsütsü tejakleni renloka aiba indang sayu.

Kasa mapang mitkartemi

anepalua school aser college azüngertem danga nok-o-nü chichiba amshitsü sayua liasü.

Iba mela nung temeket tesentem nungi kaketshir aser lanur 328 shi dena liasü.

Arunachal Pradesh legislative assembly indang Speaker, Pasang Dorjee Sonaria iba sentong ya semdanga mitkartem dang pelaba lemsatepa liasü.

BJP sorkari dang Assam tzümetsüng tebilemtsü koktettsü: Amit Shah

Guwahati, Aenjeti/January 24 (Agencies): Assam indang tzümetsüng tebilemtsü ya BJP sorkari dangi koktettsü, ta Union Home Minister, Amit Shah-i Deobarnü ashi.

Nalbari nung party indang Vijay Sankalp Samaroh sentong nung jembiba mapang Home Minister, Shah-i iba o ya shia liasü.

State nung tzümetsüng tebilemtsü koktettsü asoshi inyaktsü atema aruya aliba Assam Assembly election 2021 nung BJP nem takok ngudaktsütsü nüburtemi vote agütsütsüla, ta Shah-i ashi.

"BJP-i dang Assam nung tebilemtsü tulutiba - tzümetsüng - koktettsü. Onoki Assam ya injang aser longkak aitba nungi nüji agütsüogo. Onok nem küm pongu talila agüjang aser iba BJP sorkari Assam ya tzümetsüng tebilemtsü nungia jenbudaktsütsü," ta pai ashi.

Pai Assam nung longkak aiter aitsü aser parnok ya Congress yaria BJP sorkar atsüngdoktsü merangba dak alaka parnoki inyakba kecha mali, ta ashi.

"Item nisungtem (longkak aiter) yagi Assam nung terenlok maginer," ta Shah-i ashi.

Congress kanga sashia aitsüba mapang, "BJP ya kin balala tsüngta rongrong adokdaksü ta Congress-i aitsür, saka parnokbo Kerala nung Muslim League aser Assam nung Badruddin Ajmal den sendaktepa lir," ta pai ashi.

"Congress aser Badruddin Ajmal kabu nung Assam kumzüka mali," ta Shah-i ashi.

Assam-i nisung tamajungertem pelashishia aitaaktsütsü atema Congress aser Badruddin Ajmal ajanga kishi ajunga lapoktsü. BJP-i dang Assam ya item nisungtem nungi kumzütsü, ta pai ashi.

Paisa ashiba agi, Congress yimsüsüba mapang Assam nung kin balala tsüngta telemsa adokdaksütsü merang. "Congress yimsüsüba mapang Assam nung Assamese lanur 10,000 samaogo," ta pai ashi.

Shah-i iba mapang Assam nungi linük asoshi takum benanga agütsür Mukunda Kakati bilemtet

aser ano Srimanta Sankardeva aser Mahapurush Madhabdeva na nem akhum agütsü.

"Chief Minister Sarbananda Sonowal aser finance minister Himanta Biswa Sarma na lenisüba kübok Assam sorkari parnok mapa teti alitsüsa project tem sen crore 155 indang inyaker. Assam sorkari state nung Namghars 8,000 nem sen lakh 2.5 agütsüogo," ta pai ashi.

Paisa, Narendra Modi-i aniba NDA sorkari ang Constitution indang Arrla 370 agien aser August 5, 2019 nung Kashmir ya India den loktep, ta ashi.

Assam nung BJP-i aniba sorkari Kaziranga National Park nung ozüng alema aiter samadaksü, ta pai ashi.

Assam nung BJP yimsüsüba apang telungpur telok balala nungi züngsem 800 dak tema azüdokshiba lenmang yutsür temai adok, ta pai ashi.

"BJP sorkari Assam kübok süngolu aliba tesem nung alir Adivasi nunger indang bank account tem nung maneni sen 5,000 nungi lakh 7.20 tashi inoktsür. Ajidang masü khen atema süngolu nung inyaker mashisa aliba mapang sen 12,000 agütsüba mera agia arutar," ta Union minister Amit Shah-i ashi.

Ajidang masü ano süngolu nung inyaker taa timba kumdaaktsütsü atema maparen tenzüka lir, ta pai ashi.

Manmohan Singh lenisüba kübok Congress sorkar mapang Finance Commission ajanga Assam nem sen crore 79,000 dang agütsü, saka BJP yimsüsüba kübok Niti Aayog-i sen crore 1,55,292 kumdaaktsü, ta Shah-i ashi.

Paisa Assam sorkari COVID-19 tashidak wara den rababa atema pelaba lemsatepa liasü.

Aji masüadang Kokrajhar nung BTR Accord yanglur küm ka ajungba anogomung nung Amit Shah-i Bodoland Territorial Region (BTR) nung project ishika sayaja liasü.

Külen Amit Shah-i Assam semdangba mapang All Assam Students' Union (AASU) ajanga state tesem ajungalen Citizenship Amendment Act (CAA) anema longkak aita 'black day' munga liasü.

Assam Rifles temi NSCN (IM) züngsem ana apu



Dimapur, Aenjeti/January 24 (TYO): Assam Rifles temi telungpur telok anema maneni nokdaka aruba nung shilem ka ama general area Longsa, Wokha nung January 21, 2021 nü NSCN (IM) züngsem ana pua liasü, ta osang ka ajanga ashi.

Tsüngsü pua aruba mapang osang tejangja kar nung ajemdaker Assam Rifles den Police nungi teshimtet nübu kar

dener iba operation ya tenzüka NSCN (IM) züngsem ana apu aser tena ket nungi point 22 pistol (German make) ka, point 22 pistol (local made) ana aser magazine ana nguteta liasü.

Iba operation mapang apur den tena ket nungi ngutetba oset ya maneni bushisüngdangtsü atema Wokha Police Station, Wokha nem agütsüogo, ta osang ajangasa ashi.



11TH NATIONAL VOTERS' DAY MESSAGE

Election Commission of India was constituted on 25th January, 1950. To mark the foundation of the Election Commission, National Voters' Day was first celebrated on 25th January, 2011 and this year on the 25th January, the 11th National Voters' Day (NVD) is being celebrated. Nagaland also along with the rest of the country is celebrating the 11th National Voters' Day in the State capital Kohima, all the district HQs, Sub-Divisions and all the polling stations.


The National Voters' Day celebrates the right to vote and the vibrant and beautiful democracy of ours. The Election Department throughout the State is organising befitting program for celebration of the Day which also includes facilitation of newly registered voters and recognizing those officials who have rendered exemplary service during election or management of electoral roll.

The theme of the 11th National Voters' Day is "Making our Voters Empowered, Vigilant, Safe and Informed". In this regard, it is to mention that the constitution of India guarantees the right to all its citizens who is 18 years and above to be registered in the electoral roll and confer them the right to vote. Hence, an appeal is made to all the eligible citizens to exercise their right without fear, intimidation and inducement. All are also requested to be always vigilant against any kind of electoral malpractices, be fully literate about the electoral processes so as to be able to make informed decisions during the elections and to further follow all the current health safety protocols to ensure safe elections.

On this day, I once again make an appeal to all concerned, and every citizen to rededicate themselves for pursuing the objective of greater participation in the electoral process for an even stronger democracy.

(ABHIJIT SINHA), IAS
CHIEF ELECTORAL OFFICER, NAGALAND.

We are ...



NATIONAL VOTERS' DAY

25 January 2021



**DISTRICT ADMINISTRATION &
DISTRICT LEVEL CENTRE FOR WOMEN-
MAHILA SHAKTI KENDRA, MOKOKCHUNG.**



**CELEBRATES
BETI BACHAO BETI PADHAO WEEK
21st-26th January 2021**



**Kiyimdang sen akhangba, tetsürtem dang
jabaso asotsü anungba (pressurize) aser tebur
tanur dang aginüba tejangraba samaa
odaktsütsü shilem agidi.**

AASU-i 'black day'among; district balala nung CAA rongdok



**Sivasagar/Mangaldia/
Biswanta, January 24**
(Agencies): Deobarnü All
Assam Students' Union
(AASU)-i Assam kübok district
balala nung 'black day' mongogo.

Citizenship Amendment Act
(CAA) meyipa agiang ta
takhangba agüja parnoki
lungkak ait.

AASU-isa Assam Accord
nung sixth clause mapa küma
inyaktsü akhangba den union
home minister Amit Shah-i state
semdangba anema tanü lungkak
aitogo.

Deobarnü Amit Shah-i

Kokrajhar nung sentong ka
nung aden. 3 buba Bodo
Accord sign asüba sülen küm
ka ajungba tenüng nung iba
sentong ayonga agi.

Amit Shah-isa Nalbari nung
BJP rally ka nung o jembi.

Deomornoi College anasa
Darrang district AASU unit-i
Deomornoi Anchalik unit den
külemi wako tanak atsüket aser
CAA indang copy ka rongdoka
lungkak ait.

AASU züngsemtemisa
Sivasagar nung aliba Boarding
Road nung lungkak aitba
sentong ka agi.

Agartala nung AIKSCC-i rally ka ayongzük

Agartala, January 24, 2021
(Agencies): Tang India nung
aluyimertem longkak aitba
maparen pusema, Honibarnü
Tripura kübok Agartala nung All
India Kishan Sangharsh
Coordination Committee
(AIKSCC)-i 'Raj Bhawan'
Abhiyan (March to Raj
Bhawan) tenüng amer rally
sentong ka ayongzüka liasü.

Mangatetep adokdaksüba
farm laws asem agientsü asoshi
takhangba agütsütsü nükjidong
nung Honibarnü AIKSCC
indang activist noklang aika Raj
Bhawan, Agartala tashi tetsüng
agi jaja.

Longkak aiterem Agartala
kübok The Orient Chaumahani
nung adenshi aser iba tesem
nungi Raj Bhawan tashi rally ya
ayongzük.

Ajisüaka, longkak aiterem
circuit house tesem
matongdang, police-i parnok
nokdangadok.

Iba rally ayongba mapang,
CPI-M lennir, Pabitra Kar-i,
"India nüchiso anguba mapang
nungi, nübur memeimba, nübur
dang tauchi mesayuba Sorkar
ka yimsüsüba tashi angü.
Ajasünung, Delhi nung longkak
ait tenzüker külen nungi tanü
tashi aluyimer 150 taküm
samaogo, saka Centre Sorkari
teyari kecha magütsü," ta ashi.

Pabitra-i ashiba agi, Left
Front ajanga nungitba tentet -
AIKSCC-i Subhash Chandra
Bose asoba anogomung
nüngtem nung, iba farm laws
agentsü takhangba agütsütsü
asoshi Raj Bhawan tashi rally
ayongzütsü lemtet.

Hailakandi nung SVAYEM saya

Hailakandi, January 24, 2021
(Agencies): Honibarnü
Hailakandi district nung Re-
designed Swami Vivekananda
Youth Empowerment Yojana
(SVAYEM) sayaba sentong ka
agiogo. Rabindra Bhavan
auditorium nung iba scheme
sayatsüba mapang, tongti
tesemdang ama, Minister for
Environment & Forest, Parimal
Suklabaidya aser tanga
tongtibang nisungtemi SHGs
pungo nem dummy cheques
agütsü, ta osangbener sangdong
ajanga metetdaksü.

Iba district nung, züngsem
354 aliba SHGs 47 nem senotsü
teyari ama shilem ana lemsar
sen 50,000 (mey tenemnem)
agütsütsü terenemba lir.

Suklabaidya-i ashiba agi,
lanurtem ya linükasoshi tongtibang
lir aser taküm nung takok ngua
aotsü atema Swami Vivekananda
tesayuba agizütsüla.

Lanurtem pei meyong
shishilembaba (business)
wadang tenzütsü aser tangar

teyari magii/tangar dak
memetaloki pei sasa inyakteta
ka ita litettsü asoshi, Chief
Minister Sarbananda Sonowal
aser State Finance Minister Dr.
Himanta Biswa Sarma nati
kanga dang meranga iba
scheme tanaben
yanglushitsüogo, ta pai ashi.

Suklabaidya-i ashiba agi,
Netaji Subhas Chandra Bose,
shibai linük nüchiso asoshi
bendanga agüja inyak aser
lanurtem ajungmesotsü atema
shilem tuluka agiogo, pa asoba
anogomung den külemi
Hailakandi district nung iba
scheme sayatsü mapang agi
sempettsüba ya kodanga
mamatettsü. Kasa sentong
nung, taoba mapang minister
Gautam Roy-i, iba scheme
kübok tajangzük angur lanurtem
dang pei sasa jenjang ka
yanglutettsü, pei kibong nung
aser lokti nung tajangzük bener
arutsü asoshi iba senotsü
kümdanga aser ochishishia
amshitsü ajungshiogo.



TIR YIMYIM YIMOBILEM (EDITORIAL)

DIMAPUR TENTONÜ, AENJETI (JANUARY) 25, 2021

OCHISHIA DANG INYAKRA !

India küboksa süaka renloknüaka merenloktetba tesemji Northeast tesem ya ka lir aser Northeast state-tem Assam, Nagaland, Tripura, Manipur, Arunachal Pradesh, Meghalaya aser Sikkim rongnunga renloknüseta merenloktetba state-ji Nagaland lir. Atangji, kasa India telongjem küboksa süaka Northeast aser talisa Nagaland merenloktetbaji Delhi nungi len reprangtsü len alangba dang masü saka sobaliba, oshi aser nisung jaksübangsü tereprangtsü balala asüba den zünga shia metetba nunga India anülulen aser India tiyong nung alirtem madoksa aser memenepba kulitem ajanga lir. Ano, item kulitemji dang masü saka Assam dak alaka Northeast nung aliba state-tem kümteta aliba limatem ya lenden masü saka tenem tekongtem bushia akümba limatem lir, iba jagi train aser gari lenmangtem sadema meyanglutetba dang masü saka tayimtsüa dena arua anentetsüsa lenmang aser tesem sadema meyanglutetter, ibayongji lenden lima nung sademsadema alu ayimba aser industry tapu balala lapoka terenlok mapa inyakba ama tanga Northeast state-tem nung meinyaktetter. Aji oda, Northeast India nung aliba state-tem reloktsü asoshi, India nungsa süaka, sentong balaka nungdaker aser yamaji senotsüa talila endoktsüsa akümtsü. Atangji, linük nung sentong yanglurtemi item timtem aser nungdaktemji angatetba agi Northeast India renloktü atema nungdak reprangteta inyaktsü asoshi shisalemsatepba aser sentong yangluba sabang ka, North East Council tentet aser iba sülen ano Department of Development of North East Region (DoNER) tentetba, joko, tangbo Ministry of Development of North East Region kümogo. Iba denji ano center government kübok Ministry shia atema lemozüka sen nungi noklang nung shilem terbo Northeast asoshi amshitsü mekazüka yuja lir, anungji tangbo pei state nung nübortem nungdaktem reprangteta sentong (project) shitak yanglur, tejembi shia jembia mapa shitak amshira, Northeast state-tem atema nungdak jembitsüba bushia maoyonga NEC aser DoNER sabang nung jembiba agi pei state peribo jembia inyaktetsü. Aji oda, tang Shillong nung NEC senden nung state balala nungi yimten lenirtemi pei pei state tia aser nungdak metetdaksüba ajanga asenoki Northeast nung yimten yimsüsürtem tebilemba aser state shia nung nungdakba teinyaktsü tongtibangtem karbo metetogo. Aji oda, tanga state-tem yutsür Manipur aser Nagaland Chief minister nati pei pei state nungdak ashiba medemdangra, asenok o parnok na tia aser nungdakji anüng o ali na amai lir. Manipur state atema rongdak nungdakji, joko Imphal tonga train arutsüsa mapa terenemer, anungji joko Imphal nung railway station mesemtettsü, Myanmar o India na arrtsü longdanga atsü yanglutsü, oil palm, süngjanglijang aser aou süngküm lu ayimtsü aser raliwalirtemi saputsüsa Manipur nung akaba awatsüng aser ayongtem yanglutsüba mapatem kar indang ashiba asenoki angashiogo. Ano, külen asenok nungdaktembo tamalen nungi NEC ajanga inyaktsü asoshi tenzüka mapatem kata takok ngua inyaka moutet aser merenemtet alibatemang renemtsüba nungdaktem lir. Joko, Imphal nungi anogo nung ghonda shia tayimtsü arur aser apusor saka Kohima nung tayimtsü anendak yanglutsü mapa metenzüktetter. Imphal nungbo, joko, Sports University lapoktsü tenzüker saka Dimapur nung state stadium tilaka kümsülosü merenemetet amshir aser Dr.T.Ao Regional Football Academy mapa inyaka moutet anendaka lir. Itemji kodang medemdanga bilemdangdir, Nagaland nungbo Kohima aser Dimapur nunga kecha balaka terenlok mapa inyakba mali aser Delhi aser Shillong nung Nagaland nung terenlok mapatem takok ngua inyaka moutetba otsü aser kulitem aika jembia angashir. Item rongnungji asenok shisatsü aser mapa meindangba ajanga terenlok mapatem takok ngua metenzüktetba aser merenemetetba kulitem lir. Aiben asenoki asen nübortem ajanzükdaktsütsü bilema masü saka asen kija ajanzüksü bilema sentong yanglur. Iba jagi sen crore ter agi renemtsüba mapa ka sen crore noklang agi renemtsüsa sentong yanglur yoker. Iba jagi tangari aiben asenok dak temulung melemtetter. Nagaland nung, teti, jembia angashiba o kaji, Nagaland asoshi Delhi-i bener yoktsüba terenlok sentongji sen ishika jenjang masü saka aika jenjang yanglutsüla, ibaji dang agizüksü aser yangjiang tagitsüa alitsü. Tetezü, state nung shitakba nungdak apia masü saka asen agitsü apia asenoki sentong yanglur aser tenzüker. Iba jagi kasa mapa tanga state-tem den külemi tenzüker saka tangar renemdang asenokbo merenemer. Joko, item meindang aser meshitak mapatem inyakba ajanga asenok takoksa anguba mapatem nung ya tan ser, tang nungi danga asenoki asen nungdak yari o nung aser mapa nung ochishia shitak jembitsü aser inyaktsü merangtsüla. Asenoki dang ochishia inyakra, ochi jagi asen lima manger sangwa nung tanga lima aser yimti ama renloker alitsü.

OLEMSABANG

MISSION ASER TANU TAMANGERTEM TAMANG TIA JENJANG

~ Rev I.Lanu Jamir

Iba ocet nung kangasa tongtipang ta angatetba khuret kar shisadangner. Tanu tamangertem asoshi Lai tesayuba tai (wrong teaching) aser ano inyaksangshi palala nungia alia amangertem ajanga tebilemtsu palala bener arutsudaki. Iba tia nung tang aliba amai tamangertemi tamang masadangi zuzua lira, rongsen bendena yur Mission (Yisui nungloktsuba) meinyaktetsua ta angatetba tsutsulen nungi iba ocet zulus. Ni yangi kechisa zulus ni ajangshibatem (personal experience) nungi lir.

Alia amangertem ta asuba ya shirnok? Parnok ya - BJP, RSS, VHP aser Bajrang Dal etc telok lir. Shinuk palala saka kulemi teka amteper inyaker. January 22, 1999 anogo nung Graham Staine aser par tanur 2 tepsetba (burnt alive) ya Bajrang Dal teloki tepset. Iba mapang ya alia amangertemi India nung yimsusuba mapang liasu. Ozu Odisha nung inyakdang Mamalapusi tasur yimtsung ka nungi kibong 7 amanga ministry yangji tenzuk. Tia makai April 19, 1989 anogo nung anepdang yakta RSS nisung 40shi iba yimtsungi oa tamangertemi merenshi aser an (hen) ka tepseter iba azuji rukshi (sprinkle) aser tanu nungi iba temaitsu ajanga nenok Hindu akumer ta nangzukdaktsu. Kesa anogo nungji ku den Evangelist 2 anir tatalokbaji memeteti iba yimtsungi oshia ata. Tsungrem taochi agi iba lendong nungi onok kumzuka meyipa arutet. Tirymyim adok October 09, 2020 page 5 nung Jharkand State nung Khristan 7 dak azuk aser kou ongdoktsu. Pastor Singh kinungtsui parnok dang shiba tetuyuba agi Khristantem dak azuker ta asungdangba langzua lokti nungi kari, district 2 nung BJP lenirtem tetuyuba nung Khristantem dak azuker ta metetdaktsu.

Andhra Mission Field ya Rev Lanutemjen kenati ozu Odisha nung alidang Tsungrem sendong nung lapokba field ka lir. Iba field nung asenoki amangdaktsurtemji angopurtem (fishermen) lir. Tamangertemi Hombar nungi Honibar tashi ango apuba mapa inyaktsu aser Deobar sentepi oa Pa kulema amanger. Mapang ka nung alia amangertemi tamangertem ajak Honibar anogo sodi agitsu aser Deobar ango apui aotsu ta ozung agutsuba, Court tashi oa jembiba mapang liasu. Kodang Nagaland nung BJP 3 election nung takok ngua shimtet ta osang adok, asenoki amangdaktsua alirtemi Rev Lanutemjen dang aji shidak na ta asungdang. Pai osang nung adokbaji shidak ta langzu. Idangji parnoki iba ya Nagaland nung aliba tamangertem asoshi maksua (shame) ta ashi. Kechiyong asenokibo alia amangertemi political party ta-ang metet, saka alia amanger telok yagi India nung Khristantem dak kechi inyaker (temalen shia aliba ama) aser asenoki amangdaktsur dak anogo shia kechi ataloker ajak meteta lir.

Tang Nagaland nung MLA 60 nungi BJP MLA 12 lir. Parnoki kechisa inyaker tanu tamangertemi aika ajangshia arudaki. Asenok zuzua lira, shibai metet, taruba Government jibo BJP teloki aniba Govt. - ang asutsua akok, kechiyong Naga nungeri electionji sen-ang angatetji alia amangertemi sen agi asenok alizuktsu renema lir. Ibaji ataloktsu menua mali. Aser ibaji asangsang nung atalok nungbo tang Covid - 19 mapang amai Tenla ki shibangtsutsu mapanga arutsu sudi. Aser aji tangari asen lima nung arua meinyaktsu saka Naga nunger tamanger ata asuba teloki inyaktsu. Mika 7:6 nung - Nisung ka tsukchirtemji pei kibong nungi lir ta shia lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung jenshiba Khristanem Yangon tezülen jenokogo



Myanmar linük nung rara ajanga jenshiba Chin Khristanem Yangon yimti tezülen yim tasen ka kümteta ki asüba noksa nung angur.

January 24, 2021: Northern Myanmar linük nung rara ajanga jenshiba Khristan telok ka Yangon yimti tezülen jenoka ki yanglu tenzükogo.

Buddhist yimsü amanger nütsüng timba aliba linük nung 2018 küm Rakhine State nung rara adokba ajanga nisung lakh dak tema jenshia liasü.

Myanmar sepaitem aser Arakan Army na tsüngda rara adokba ajanga Rakhine lisopurtem aika asü, aika yiru aser aika jenshia liasü.

Iba mapang nungji Rakhine State nungi Khristan aika anasa aliba Chin state nung jenoka liasü, ibayongji Khristan nütsüng timba aliba Chin nunger aika yimtsüng toktsür ao.

Chin State nung Khristan lenir, Kan Lwat-i, "Chin State kübok ozü jila nung rara adokba ajanga onoki timtem aika ajangshia liasü," ta metetdaksü.

Arrshi küm 36, Kan Lwat ya Chin Khristan 80 rongnung lenir; parnok Paletwa jila nungi kilometer 600 shi jajaba sülen Myanmar nung shishilembaba

yimtiba, Yangon nung mapang tatsüka camp yanglur jenoka liasü.

Taoba ita parnok Yangon kübok Hmawbi jila nung tesüsa jenokba sülen jila tezülen yim tasen ka kümteta Baythala (Bethel) ta jaogo. Laishiba otsü nung Bethel ya nüngdakbapurtem jenokba jila ka liasü, ta Kan Lwat-i ashi.

"Iba tetezü iba tesem nung Yisu temoatsüba liasü aser Pai timtembapurtem yari, aser iba jila nung tesünep alitsü," ta pai ashi.

Tang tashi nungbo yangi tziü supply mesüra light mali, iba denji külemi kiojen yanglutsü atema parnoki tetenlartem dang nungi senotsü teyari ataba ajanga ki süzüktsü mapang talangka agir, ta paisa metetdaksü.

Coronavirus wara ajanga Yangon nunga rongsenkettsüng tsütsü timtem kanga ajuruba den külemi Chin Khristanem atema mapa angutsü kanga tasak kümogo.

"Tang tashi nungbo onok

mapa mangur. Christian organisations aser Chin temeden atema inyaker telok balalai onok nem chiyungtsü tenla agütsüdar," ta pai ashi.

Tang timtem aika ajuruaka tangbo Khristanem tetsübu kecha makai tesünep nung alir, iba yimtsüng ya Tsüngremi onok nem moatsüba lir, ta pastor Aung Far-i ashi.

"Onoki kidangi meyipa onüaka yangji yimjung mali, kechiyong tang tashi rara lir," ta pastor-isa ashi.

Arrshi küm 35 pastor-i, "Iba yimdak ozü kidang akumli piyong alitsü ta ni amanger. Ni yangi kanga pelaa alir. Ozü yimdak aliba dang nungibo yangi ali tajungba," ta ashi.

Kan Lwat-i ashiba agi, coronavirus wara süngjemba sülenbo taintemi mapa angutsüa akok aser yangi aliba tanur 30 dak temai shisaliok tajung angutsü.

"Onok jangratema maliyonga tanurtembo tarutsü nung jangratema lidaktsüner," ta paisa ashi.

Khristan lenirtemi Cuba sorkar dang pastor chioktsü akhanger

January 24, 2021: Cuba nung Khristian lenirtemi communist sorkar dang Pastor, Karel Parra Rosabal tangsa chiokang, ta takhangba agütsüogo.

Pastor Rosabal ya register masüba Arogo ka nung tongti lir; pai osettem alizükba kuli malir aser oset aika alidena ayur ta yazü nung tai tonglokja apuba sülen pa anogo 12 dak tema pua lir.

Rosabal ya Fuego y Dinámica Apostolic Arogo nung pastor inyaker aser January 12, 2021 nü La Tunas kübok Jobabo jila nung police-i pa pua liasü.

Police-i pa dang, "Nai ozüng alema Arogotem tenzüker, aser Cuba linük nung ibaji khenyongi memelar," ta ashi.

UK nung amenoka aliba

Christian Solidarity Worldwide (CSW)-i ashiba agi, pa apuba sülen mezüngbuba anogo ana nung pa shinga den-a majurutepdaksü aser pai kecha mechii liasü.

CSW-i, "Coronavirus wara mapang nung Cuba sorkar ketdangsertemi Khristan lenirtem kuli makai oset aika alizükogo, ta ashi.

Police-i pastor Rosabal'er ki mita bushiba sülen police-i pa dang, nai kuli kaket makai oset aika alizükba kulitem sayutettsü aser pai ozüng alema meinyak.

Cuba nung Apostolic movement kübok Arogo aika lir,

ajisüaka Cuba nung Castro-i aniba sorkari iba denomination ya ozüng alema, ta sangdonga tamangba yimsü telok nung register mesüdaktsür, ibayongji sorkari pastor anema inyaker, ta bilemer.

Rosabal anema Brihostibar nungi ken o angadangtsü sentong liasü, ajisüaka pa anema maneni bushisüngdangtsü atema ken o angadangtsü anogo atsülangogo.

1992 küm Cuba linük temzüng nung Cuba linük ya Tsüngrem dak mamangba linük ka masü saka secular linük ka lir, ta sangdonga liasü.

Fuego y Dinámica Apostolic Arogo nung pastor Karel Parra Rosabal'er kibong noksa nung angur.

ANOGO ABEN TSÜNGREM DEN

Sannüker nungi tesüngzük T. Ken 23:3

Ne Sannükeri ne nüngdak ajak metet. Pa den aini aodang na belemsettsü ta Pai metet. Na anisüngzük mapang nüngdak ta Pai metet. Na tashi tasen nüngdak ta ne Sannükeri metet. Na mopu nung mesüra tasüngtet ayongküm nung na anisüngzüktsü mapang ne Sannükeri metet. K en ken ne Sannükeri na soettsü akok. Ken ken ne Sannükeri agütsüba temoatsü nung pelatsü akok. Sannükeri na teti kasa leman nung manir; Pa telangzüba teti na tang nüngdakba den sendaktepba nung langzür.

Nai ne Sannüker anidakdang ne taküm aibelenba mapanga ajurutsü, tetentangba nai ajurudang mesüra nai noktangtsüba tatitangba ajuru dang. Nai ajuruba rishikangshi mesüra tangar asoshi nai abenba khuret ajanga atsüzüktsü akok. Sannükeri azüokba nung na aniadoktsü akok. Khristan aini aoba nung nai joko motettsü ta ashitsüsa mapang arutsü akok. Iba jenjang jagi kodang arutsü ne Sannükeri metetta lir, aser teti Pa taneptsü kar! Pai na tashi itdaktsütsü leman aieka lir: Pa o ajanga, tangar ajanga, mesüra ne tia ajanga Pai ne nüngdak nai inyakba dang nungi tajungba metetta lir.

Na belema toker asü? Ne tanela tashi itshitsü nüngdak asü? Nai mulungba yanglushitsü tebilem. Tsüngremi dang koda anebtsütsü metetta lir (Isaiah 40:28-31, Mathi 11:28-30). Pai ibaji abensa inyaktsü, ken tebangkatsü leman nungi meyipa yanglushitsü Tsüngrem dang asüngdangang, aser Pai kechi inyaker agizüktsü renemang.

Arogotemi US Tir dang Syria nung tenokdangba agentsü mepishir

January 24, 2021: Middle East nung aliba Arogotemi United States Tir, Joe Biden dang Syria nem rongsenkettsüng teyari magütsü aliba tenokdangbatem agienang, kechiyong rara aliba linük nung nüburtem kanga timtemdar, ta mepishia metetdaksü.

Syria nung mapang talangka nungi rara aliba ajanga nüburtem timtemba mapang nung ano coronavirus wara prokba ajanga nüburtem taliba timtemdar.

Yaküm June ita nung US sorkari Syria Tir, Bashar al-Assad-i aniba sorkar foreign business nokdangtsü nükjidong nung rongsenkettsüng tsütsü tenokdangbatem benoka liasü.

Syria nung sorkari nüburtem anema inyakba mapatem nokdangtsü atema US-i tenokdangba kar benoka liasü.

Ajisüaka tawa UN report ka ajanga ashiba agi, Syria sorkar anema rongsenkettsüng tsütsü tenokdangba balala benokba ajanga sorkar dang masü

nüburtema kanga timtemer.


Ajioda Middle East nung aliba Arogotemi shidi ka ajanga US Tir tasenba, Joe Biden dang Syria anema rongsenkettsüng dak sendakba tenokangba agienang, ta mepishi.

Iba shidi nung sign süa alirtem rongnung Their Beatitudes Syriac Catholic Patriarch Ignatius III Younan, Melkite Greek Catholic Patriarch Youssef Absi, Syriac Orthodox Patriarch Ignatius Ephrem II aser Secretary General Middle East Council of Churches (MECC), Dr. Michel Abs nunger densema lir.

World Food Program (WFP)-ia, "Region nung ayawara tensa lir aser Syria nunger million aika chi mechiyungi yimdeni ayir. US-i tenokdangbatem benoka aliba ajanga Syria nunger kanga timtemdar," ta metetdakja liasü.

2011 küm Syria Tir, Assad anema nokdakba sülen Syria nunger lakh 4 jungnüa süogo aser nisung million 11 dak tema jenshiogo.

OLONG PAITEP # 5704



TIPIEN

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ - (4)
13. Yagi ajak ashiohtsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 5703 TELANGZÜBA

TIPIEN :

1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük, 11. teronem,
12. Sempa, 13. Jahaz.

WARAKLA OAGI INDIA LEN LIR COVID-19 SÜLEN
ASEN LIMAI ARUA THALABULAR

- Tetsü** : Talak, nabo ak chiji ak kidangji lua tokokjangjong.
(Tatsüka lir külen)
- Warakla** : Oja oja, asen ak tuluba o tilaba nato mejitepa fighting südar, pyar mali pyar mali!!
- Tetsü** : Hai mazükla, asa mepenjai tokoktsür adokang.

Lilir : WhatsApp

TANÜBO NAI LANGZÜANG

Q. Koba kum 1buba Aero India ayongzük?

A.1996

B.1997

C.1998

D.1999

===== (Taruba adok nung onoki langzüksü)

YASHI ADOK TELANGZÜBA : ideaForge



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Tepela
Tasoba Anogo

NAI-A YA METETTER MA?

JANUARY 25 NÜ ASOR TONGTIBANG NISUNG KAR:

- Scottish poet Robert Burns - 1759
- Soap maker & philanthropist William Colgate - 1783
- Author W. Somerset Maugham - 1874
- Author Virginia Woolf - 1882
- Hall of Fame broadcaster Ernie Harwell - 1918
- Football Hall of Fame member Lou Groza - 1924
- Former Philippine President Corazon Aquino - 1933
- Singer Etta James - 1938
- Football Hall of Fame member Carl Eller - 1942
- Actor Leigh Taylor-Young - 1945
- Track star Steve Prefontaine - 1951
- Actor Jenifer Lewis - 1957
- Actor Dinah Manoff - 1958
- Singer Alicia Keys - 1981
- Actor Michael Trevino - 1985



Alicia Keys

SUDOKU # 5745

	2	4						7	1	2	4	6	8	5	9	3	7
7	6						8	2				7	6	5	3	1	9
8	9		7	4					8	9	3	7	4	2	5	1	6
5	8				6				5	8	1	4	3	6	2	7	9
			5	9		6	4		2	3	7	5	9	1	6	4	8
9			2	7	8	1	5		9	4	6	2	7	8	1	5	3
4		9				7	6	5	4	1	9	8	2	3	7	6	5
3			1	6	7		9	2	3	5	8	1	6	7	4	9	2
6	7	2			4		8		6	7	2	9	5	4	3	8	1

TELANGZUBA # 5744

OJANG LUTEP # 5292

- BUNÜR :
- ARK :
- DENMERA :
- SÜNÜTNG :
- KAAI :
- ADYONGENSHIA :
- KTLOI :
- NDESEN :
- AMER :
- MTAKEER :

OJANG LUTEP TELANGZÜBA # 5291

ANÜNG TONGA MEJUNGTETA AKAYONGJIA TANGAR
DANG TEMEIM MESAYUTETRA AKABAJI AMAJOK

TAN HOPTA ATEMA - KOMA SÜLA ?

Q. Nagaland nung ya Assembly constituency 40 dang aküm nunga süla ?

Olong 29 shi nung January 22, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsüsü.



Amongnū Tamil Nadu kūbok Erode district nung aliba Pannerselvam Park nung Congress lenir, Rahul Gandhi-i Tamil Nadu assembly election nūboyim sentong ka nung jembiba noksa nung angur.

R-Day nung aluyimertemi tractor lakh 2 amshia longkak aittsü

New Delhi, Aenjeti/January 24 (Agencies): January 26 nū Republic Day nū Delhi nung aluyimba ozüing tasen asem anema longkak aiter aluyimertemi tractor lakh 2 dak tema amshia 'Kisan Parade' nung shilem agitsü.

Item tractors senzūba achaayangtsü atema volunteer 2,500 shimogo aser lokti apir nūngdakra ano volunteers tali lenzüksütsü, ta aluyimer unions balala nungi lenirtemi metetdaksü.

Punjab's farmers' union senden nung jembidang Kirti Kisan Union Tir, Nirbhai Singh Dhudike-i, Punjab nungi tractor

lakh 1 dak tema Delhi tonga arutsü, ta metetdaksü.

Singhu nung ghonda asem senden amenba mapang nung Republic Day nū tractor parade agitsü atema o lemtepa liasü.

Yaküm November 28 nungi tenzüka Punjab, Haryana, Maharashtra aser Uttar Pradesh densema state balala nungi aluyimertem meyrjang aika Delhi arrtsülen adenshia sorkari benokba aluyimba ozüing tasen anema longkak aiter.

Ajisüaka Rajpath, Delhi nung Republic Day parade tembangba sülen ang (12:00 ako sülen) tractor parade agitsü, ta aluyimertem unions-i

metetdaksü.

Tractor rally dak sendakba nung osangbenertem den jembidang Singh-i, Central committee ka tentetogo aser parnoki tractor parade sentong ajak achaayangtsü, ta metetdaksü.

Aluyimertem lenir, Abhimanyu Kohar-i, January 26 nū tractor rally agitsü atema Delhi Police-i temelaba agütsüogo, ta Honibarnü metetdakja liasü.

Tractor parade ji Delhi kūbok Ghazipur, Singhu aser Tikri arrtsülen nungi tenzüksü aser Delhi Outer Ring Road nung agitsü.

India nung anogo trok tsüngda Covid vaccine million 1 agütsüogo

New Delhi, January 24 (Agencies): India nung coronavirus vaccination tenzüka sülen anogo trok tsüngda linük nung covid vaccine agir million 1 ajungba atema Union Health Ministry-i tenüngsang agütsü.

India nung nisung aikati coronavirus vaccine agiba mapang nung health ministry-i maneni UK aser UK densema terenlok aliba linüktem nung vaccine agütsüba den-a

medemdangdar.

Tang tashi nung India nung coronavirus vaccine agir lakh 16 jungogo, ta Amongnū anepdang ketdangsertemi metetdaksü.

Health ministry-isa, US aser UK den medemdangra coronavirus vaccine agir million 1 tekeraba ajungba linükji India lir; Million 1 ajungtsü atema UK nung anogo 18 agi aser US nunga anogo 10 agia liasü, ta metetdaksü.

Amongnū anepdang tashi nung India nung coronavirus tashidak agi tang teshirangdakpur 1,84,408 lir, aser ibaji caseload nungi shilem 1.73 dang lir.

Tesüiba ghonda 24 tsüngda linük nung covid agi shiranger 15,948 anepogo.

Tang linük nung teshirangdakpur shilem 75 bo Kerala, Maharashtra, Karnataka, Uttar Pradesh aser West Bengal state tem nung lir.

Andhra Pradesh nung ASHA Worker ka Covid Vaccine agiba sülen asü

Amaravati, January 24 (Agencies): January 19, 2021 nū public health worker tetsür ka coronavirus vaccine agia liasü aser la Amongnū anepdang yakta Andhra Pradesh kūbok Guntur district nung aliba sorkar hospital ka nung süogo.

Arrshi küm 44, Accredited Social Health Activist (ASHA) worker, Vijaya Lakshmi'er kinüngertemi ashiba agi, la coronavirus vaccine agiba sülen temang nung timtem adoka asü; ajisüaka sorkar ketdangsertemibo la asüba kuliji tang tebushidak lir, ta metetdaksü.

Health ketdangsertemia, la asüba kuliji post-mortem report agiba ajangadang jangjatsü, ta ashi.

Ketdangsertemi ashiba agi, la asübaji vaccine agiba den sendakatepa mali amai bilemer, kechiyong tang tashi nung Guntur district nung nisung 10,000 dak tema nem covid vaccine agütsüogo saka tang tashi nung Adverse Event Following Immunisation (AEFI) ka danga mali.

ASHA worker, Vijaya asüba sülen lar kinüngertem aser Government General Hospital,

Guntur nung ASHA worker temi longkak ait tenzükogo aser sorkar dang temenok sen lakh 50 agüjang, ta takhangba agütsüdar.

Guntur district collector, Samuel Anand-i, sorkari tekaraba nung asür jabaso nem sorkar mapa ka agütsütsü, ta sangdongogo.

"Sorkar scheme kūbok ki angutsü atema lar kibong temsüa lira lar kibong nem ki-a agütsütsü," ta Anand-i osangbenertem nem metetdaksü.

District collector-i nangzüka o jagi melung mesüi asür kinüngertem aser opposition Telugu Desam Party (TDP) nungi lenirtemi hospital kima mener longkak ait.

Vijaya Lakshmi'er kinüngertemi ashiba agi, la January 19 nū vaccine agiba sülen January 21 nū temang meta-a shirang; iba denji külemi Guntur nung aliba nija hospital kati la magizükba agi la sorkar hospital-i anir aotsüsa aküm.

Yangji doctor temi, la tekolok stroke asü, ajisüaka la Covid vaccine agiba ajanga AEFI timtem adok, ta metetdakja liasü.



Kanyakumari district, January 24, 2021: Amongnū Kanyakumai district nung Ato kilonser, Narendra Modi'er adianu, Prahlad Modi-i Nagercoil Nagaraja tekülem ki semdangba mapang tangokba noksa nung angur.

Totzü jenjang atuba atema Congress-i sorkar aitsü

New Delhi, January 24 (Agencies): Linük nung totzü jenjang kanga atuba atema Honibarnü Congress-i Centre sorkar aitsü aser Modi sorkar mapang nung totzü saru atuba ajakji tanaben ajemang, ta takhangba agütsü.

Congress lenir, Rahul Gandhi-i, totzü nung jenjang kanga atuba agi nūburtem kanga timtemer ajisüaka Modi sorkarbo saru saruba nung kanga mazünger, ta aitsü.

Honibarnü India nung petrol aser diesel jenjang atubaji tang timtiba asütsü aser tesüiba hopta ka tsüngda tang agi pezübenbuba totzü jenjang atur.

Amongnū Delhi nung Congress otangdar, Ajay Maken-i, petrol jenjang tang tasakba küma litre ka nung sen 85.70 aser diesel litre ka nung sen 75.88 kümogo, ta metetdakja liasü.

Osangbenertem den jembidang Ajay Maken-i, "Taoksatsü osangji ya lir- 2014 küm May ita tashi nung Congress yimsüsüba mapang nung international crude oil jenjangji barrel ka nung US sen 108 liasü, aser iba mapang nungji petrol litre nung sen 71.51 aser diesel litre ka nung sen 57.28 dang liasü.

(Maneni tapak 9 nung...)



January 24, 2021 nū Srinagar nung Paramilitary sepaitemi mask agir Republic Day parade atema renemshiba mapang tangokba noksa nung angur.

Navalny busema longkak aiter nisung 3,000 shi puogo



Moscow, Russia nung Tir Vladimir Putin anemsang, Alexei Navalny apuba mechi pa busemertemi pa chioktsü asoshi longkak aitba mapang mitkartermi longkak aiter dak azükba noksa nung angur. Honibarnü nungi tenzüka Russia nung yimti balala nung longkak aitba mapang nisung 3,000 dak tema puogo.

Moscow, Aenjeti/January 24 (Agencies):

Kremlin anemsang Alexei Navalny apuba chioktsü atema Deobarnü Russia linük tesem balala nung asük-asa arema aser police-i ashiba manga longkak aitba mapang nisung 3,000 dak tema apu aser longkak aiter senshidaktsütsü atema tashi amshi.

Navalny dak taoba küm August ita nerve agent miim mozü amshiba sülen Germany nung temang anepalua munger Russia-i hopta tatemlen mezüing meyipa shilangba mapang apu, aser pai pa busemer dang pa chioktsü atema takhangba agüja longkak aittsü ayongzüka liasü.

Ketdangsürtemi nübürtem dang Honibarnü longkak aitba nungi pila alitsü ashi, kechiaser iba ama sentong ya ajanga COVID-19 menatsü aser temelaba melie agiba sentong nung adener nem temerenshi agütsütsü aser tepuokdak ayutsü akok, ta shia liasü.

Saka longkak aitertermi iba tenokdangba magizük, aser tesem kar nungbo temperature ya -50 Celsius (-58 Fahrenheit) dang temokongba liaka longkak aita liasü. Navalny chioktsü atema taruba hopta tatami kasa sentong ayongzüksü, ta Navalny tembar Leonid Volkov-i ashi.

Central Moscow nung nisung 40,000 shi adenshi, ta yangji aliba osangbener temi ashi, koba temelaba melie rally ayongzüksü rongnung lokti tulutiba adenshiba alitsü südi, ta ashir, kong police temi nisung putena anasa aliba gari nung tashiyim agi anir oa mendaktsü.

Ketdangsürtemibo nisung 4,000 shi dang liasü ta ashi, aser foreign ministry ajanga osangbeneri asadangba nung tai apu.

"Nisung million 4 liasü ta ashitsü tajungba," ta parnok indang Telegram messenger channel nung anemsü agi ashi.

Linük yimtiba nung nisung 50,000 adenshi, ta Navalny tembar Ivan Zhdanov-i ashi.

Longkak aiter kari "Putin ya auer," aser "Maksü" aser "Navalny chiokang" ta ayimtena liasü.

Navalny kinungtsü Yulia ya longkak aitba tesem nung khen pua ayu aser chiok. Navalny tembar yimten yimsüsür kar longkak aittsü anogo ishika lia apu aser kar longkak aitba mapang apu.

Jila aser yimti 100 shi nung longkak aitba mapang nisung 3,435 apu, aser item rongnung Moscow nung nisung 1,360 aser St. Petersburg nung nisung 523 pua liasü, ta OVD-Info protest monitor group ajanga ashi.

Longak aiter aser osangbener anema tashiyim yimya amshi aser Navalny ya tekeratiba nung chioktsüla, ta United States-i ashi.

"Alima ajunga nung mela aliba tashi amshiba atema pua alirtem Russia ketdangsürtemi chioktsü ajungshir," ta US State Department indang odongtar Ned Price-i sangdong ka nung ashi.

Ketdangsürtemi tashi onsara amshiogo, ta European Union indang foreign policy tekolakba, Josep Borrell-ia Twitter post ka nung lemsatap aser Britain indang foreign minister Dominic Raab-ia yimjung nung longkak aiter aser osangbener anema azüdokshiba aitsü.

Arishi küm 44 tain okatsür Navalny ya Moscow prison ka nung lir. Tir Vladimir Putin-i pa tepsettsü totuyuba agütsü, ta pai ashi. Saka Putin-i magizüker aser US teyari nung pa tenüing menüktsütsü atema inyakba maparen nung Navalny ya shilem ka lir, ta ashir.

Moscow nung longkak aiter arishi küm 53 tain Sergei Radchenko-i ashiba agi, "Ni tsüba aliba agi lakogo. Ni aser Navalny kisüing atema longkak aitdaki aruba masü, saka ozü tanur atema aru, kechiaser iba

linük nung parnok tarutsü nükla mali."

Kremlin nungibo osang kecha sangdonga mali aser taoba mapang longkak aitba ya ozüing alema lir aser rara mesürtem, ta shia liasü.

Longkak aitertermi police officer tem anema azüdokshi, ta tai tonglokja sorkar meyong obendanger temi ken o benokogo.

Berlin, Hamburg aser Munich nung Navalny apuba anema nisung 1,000 jungnüa longkak aita liasü. Bulgaria aser Paris nunga longkak aitba osang lir.

Moscow nung longkak aitba osang abener kar apu, aser iba yongji US Embassy ajanga arrja liasü.

"Russia ketdangsürtemi yimjung nung longkak aiter, osangbener apur. Free speech aser yimjung nung adenshir ajemreptsü merangba maparen ka amai ajiteter," ta odongtar Rebecca Ross-i ashi.

Mobile phone aser internet service nunga timtem ajurua liasü, ta monitoring site downdetector.ru ajanga ashi, koba longkak aiter osangtsüsang agitepba tasakba kumdaktsütsü atema ketdangsürtemi inyakba tasa ka lir.

China nung hon atur 11 kümzükogo

Beijing, Aenjeti/January 24 (Agencies):

China nunger tekümzükertemi Deobarnü hon atur 11 kümzükogo. Parnok anogo 14 tashi sabanger liasü, ta state broadcaster CCTV-i metetdaktsü.

TV footage ajanga anepdang mezüingbuba nisung anitetba sayuogo. Pa tenük sü agi zübangtsür liasü.

Iba hon atur ya kanga tashi mait liasü, ta CCTV-i parnok indang Weibo site nung ashi. Tekümzükertemi iba nisungba nem sü ka abenloksür ambulance nung mozüki dangi anir ao.

Iba sülen ghonda ishika tsüingda hon atudak tesem

Bangladesh-i Myanmar nungi jang alitsü

Dhaka, Aenjeti/January 24

(Agencies): Rohingya refugee nunger dak sendakba nung mangatettep liaka item ajak toktsür linük nung chiyongtsü agi anüingba nungi jenbotsü atema Bangladesh-i Myanmar dang nungi jang tone 100,000 alizüktsü telemtetba agiogo.

Jang nung jenjang atuba ajanga Dhaka sorkar timtem nung lir. Taoba küm tzümetsüing ajanga tsünüsenpongtsü raksatsüba sülen jenjang aika akümba bentettsü atema tang sorkari kanga meranga inyakdar.

Muslim nunger timba aliba Bangladesh aser Buddhist nunger timba aliba Myanmar na Rohingya Muslim nunger refugees million 1 dak tema dak sendakba nung tesendaktep mejungi lir. Myanmar nung sepaitemi makyonga aoba sülen 2017 küm Rohingya nunger timba Bangladesh-i jena ago. Iba tatalokba ya UN bushitsüingdangertemi kin samatsütsü merangba inakyim ka ta shiogo, ajisüaka Myanmar-i iba taitzüba magizüker.

Sorkar o sorkar na tangatettep nung cost, insurance aser freight (CIF) liner out basis densema Bangladesh sorkari tone ka nung USD 485 agi jang alizüktsü, ta food ministry secretary Mosammat Nazmanara-i ashi.

"Onok nükjidong tongtibangtibaji jang nung jenjang ajemdaktsütsü asoshi lir," ta Khanum-i Deobarnü Reuters dang ashiba den sorkari jang tone million 10 alitsü aser jurila shishilembartem nem jang tone million 10 alidaktsütsü, ta shisem.

Tenangzüktepba yakta yanglutsü aser April tashi nungbo shilem balala lemsar jang agütsütsü, ta lai ashi.

Bangladesh-i tang India state-run firm NAFED dang nungi jang tone 150,000 alitsü atema sorkar o sorkar na tsüingda tenangzüktepba yangluogo aser kasa mapang nung jang alitsü atema tender aika agütsüogo.

"State o state na tsüingda angatettepa onoki India nungi jang timba alitsü akok," ta Khanum-i ashiba den Food Ministry-i, India nung state agencies balala den sensaksemdar, ta ashi.

Bangladesh ya alima nung jang adokdaktsüba linük tulutiba rongnung tasembuba lir aser parnoki küm nung jang tone million 35 shi adokdaktsür, ajisüaka nübürtem mesütsü atema timba amshiatoker. Jang aika adokdaktsüaka tsüingsarusa aser tzümetsüing agi timtem agütsüba ajanga tanga linük nungi jang belena chiyongtsüsa akümer.



Deobarnü Portugal nung tir election agiba mapang Lisbon nung nisung kati vote agütsüba noksa nung angur. Arishi küm 72 tain, Tir Marcelo Rebelo de Sousa-i iba election nung maneni takok angutsü südi, ta asadangteta lir, kong tir menden atema ano nisung trok tokteper. Portugal linük tekolakba kabu nung legislative tashi mali saka linük anitsü atema pai mapa tulu inyakteter.

China nung hon atur 11 kümzükogo

balala nungi hon atur 10 anitet, shirnok taoba hopta nung tekümzükertemi chiyongtsü agüja mesüa liasü.

Parnok rongnung ka yirur liasü saka aika tekümzükerteyari agia peisasa jajaba nguogo. Parnok ajak tenük sü tanak agi zübangtsür liasü aser ambulance nung temang anepalutsü atema mozüki-i anirogo.

Qixia nung January 10 nü langka apokba sülen Hushan mine nung hon atur 22 anenbanga liasü. Shandong province, Yantai administration kübok iba tesem ya hon adokdaktsüba tongtibang tesem ka lir.

Tia maka hon aturtem rongnung kabo süogo.

Ketdangsürtemi Brehostibarnü ashiba agi, nisung 10 kümzüktsü atema ano hopta ana shi agütsü, kechiyong parnok tonga aitsü atema drill shafts matu tsüingda tenokdangba aika agintsü lir. Ajisüaka item nisungtem nem rescue team-i chiyongtsü teperi agütsüdar.

Osang ajanga ashiba agi, item nisungtem ajak temang anema dang lir aser Honibarnü nungi tenzüka nutrient solutions melena teti achiba chiyongtsütem agütsüdar, ta Xinhua sangdong ka ajanga metetdaktsü.

PROGRAMME FOR CELEBRATION OF 72nd REPUBLIC DAY ON 26th JANUARY, 2021 AT NAGALAND CIVIL SECRETARIAT PLAZA, KOHIMA

- 0600 hrs:** Hoisting of National Flag in all Government Offices, Institutions/Public & Private Buildings.
- 0850 hrs:** Review of Parade by DGP, Nagaland.
- 0900 hrs:**
1. Hon'ble Governor arrives, unfurls the National Flag, receives Rashtriya Salute and inspects the Parade.
 2. Address by the Hon'ble Governor
 3. Presentation of Awards.
 4. March Past.

Parade Contingents:

1. 1 Assam Rifles
2. 78 Bn CRPF
3. 93 Bn BSF, Chedema
4. DEF, Kohima
5. 4th NAP Bn, Thizama
6. 11th NAP (IR) Bn
7. 15th NAP (IR) Mahila Bn
8. Home Guards & Civil Defence
9. Nagaland Police Brass Band, PTS
10. 14 Assam Rifles Pipe Band

Parade Commander : Shri Nikho Venuh, Dy. Commandant, 10th NAP (IR) Bn.

Parade 2nd in-Command : Kumari Ayangla Pongen, Asstt. Commandant, 15th NAP Bn.

CULTURAL PRESENTATION

1. Dance Display : Women Resource Department

2. Fusion Music - Run Monday Run : TAFMA

3. Cultural Troupes:

- A. Angami Cultural Troupe
- B. Khiamniungan Cultural Troupe
- C. Rengma Cultural Troupe

Inauguration of Exhibition Stalls by the Hon'ble Governor

1200 hrs: Governor's "At Home" - By invitation

EVENING PROGRAMME AT SECRETARIAT PLAZA

1615 hrs: Prize Distribution.

1630 hrs: Beating of Retreat.

75th Birthday I. Sungit Longkumer



Temeim Oba,

Na onok akümtong, temolung ayudak aser onok nukrangtong. Nu taküm ajak bendanga agüja onok anitetba yong tanü onok tenük saladaktsü aser taküm nung nüji tia ngudaktsüogo. Nü dang Kanga pelar aser onoki na kanga meimer. Nu taküm asoshi onoki teti Tsüngrem nem tenüngsang agütsür. Tsüngremi nü nem arushi talang aser anema aliba Kibuba sentsüwangshi asoshi moajangma ta onok sarasadem !

Temeim Kinungsü, Jala-Jabosatem aser semchirtem.

Leshemi yimtsüng nung sobaliba sütakba yimya saya

Phek, Aenjeti/January 24

(TYO): Nagaland nung sobaliba sütakba yimya kodang tongtibang iba indang tangazükba agütsütsü atema District Administration & DLCW- Mahila Shakti Kendra (BBBP)-i Beti Bachao Beti Padhao week 2021 nung shilem ka ama January 23 nü Phek district kübok Leshemi yimtsüng nung awareness program den sobaliba sütakba yimya sayaba sentong ka ayongzüka kaogo.

DA aser DLCW MSK sangdong ka ajanga Honibarnü ashiba agi, yimtsüng nung tetsürtem den sütakba yimya tasen aser India nung tesem balala den shishilembatsü atema shishilembadak tasen lapoktsü lenmangtem bushitsü asoshi sensaksema liasü.

Sentong nung o jembiba mapang IAS, SDO (c) Nodal Officer BBBP, Phek N Bhavani-i, oset yokyatsüyatsü atema lenmang shidak mesapoktetra stinging nettles fabric ya shishilembatsü atema kanga tajung asütsü ta ashiba den tetsürtem dang modern design tem amshia sü ataktsü ajungshi.

Tawa designers aser brand shidak den sendakteptetba atema Leshemi women society nem tenüngsang agütsüba den lai sobaliba yimya tem wazüka ayutsü kodang tongtibang iba indang lemsatepa liasü.

Laisa, osettem nüburtemi aginütsü ya yanglutsü atema sobaliba yimya den tanü asüng yimyatema bendenloka inyaksangshitsü ajungshi.

Thebvo meneh mekhela ataktsü atema oset bendenba nungi shir konga ayuba, sentsü nüloktsüba aser atakba jenjang balala ajunga ya telongjem aser yimdaklirtemi inyakyim shidak benoka inyakba ajanga lir ta lai asatetba lemsatepa liasü.

Kasa mapang nung EAC, Phek Wetsho Lasushe-i,

sütakba ya sobaliba nung shilem ka ama dang masü saka profession ka ama agitsü nüngdaker ta ashi. Pai, tasa tajungtem ya osettem ajanga sayutsüla, ajita asünungdang shishilembadak yoktettsü, ta ashi.

Sentong lenir Neipetso Lomi-i, okila jembiba mapang stinging nettles (Thebvo in Kuzhale) yimya ya tetsü-tebou mapang nungi benschia aruba angazükyonga aruba lir aser Chakhesang nunger aliba tesem nung Leshemi yimtsüng nung mezüng benschia ta amanger, ta ashi. Leshemi yimtsüng nung alirtemi iba sobaliba ya tanü tashi wazüka benschia arudar. Iba sobaliba ya wazüka ayutsü atema yimdaklirtemi Leshemi Origins ta nüngja agütsür brand ka yangluogo, ta pai ashi.

Setong nungsa tetsürtemi stinging nettles yangluba yimya sayu, koba dang Kuzhale nung Thebvo ta ajar.

BBBP week 2021 nung shilem ka ama District Administration & DLCW- Mahila Shakti Kendra (BBBP)-i January 21 nü nungi 26 tashi agitsü sentong balala yanglua lir, kong dadi-poti/grandmother-granddaughter selfie sentong, Phek HQ nung HoD tem nem aser Phek District kübok the Sub-division ajak nung BBBP calendar lemtsüba, "I stand for her" omen nung ajemdaker Online sangro mejemtepba tetoktepba, baby kits lemtsüba aser mozüki nung tanur asotsü ajungshitsü atema kuli kakat district hospital Phek nem agütsüba, Phek district BBBP omen ken local channel/media nung sayaba, selfie tetoktepba osang sangdongba, takokertem nem tetushi agütsüba sentong, Republic day nü BBBP stall sayaba aser iba sülen Signature Campaign ayongzüka agitsü aliba amala sentongtem balala densema lir.

Rakul Preet Singh-i 'Thank God' tangoktsü



Mumbai, Aenjeti/January 24, 2021 (Agencies):

Tesüiba anogo ishika tejakdang Hyderabad nung, 'Mayday' atema Rakul Preet Singh-i Amitabh Bachchan aser Ajay Devgn (director) na den külemi

tangokba nguogo. Tang, actress Rakul ya Mumbai nung lir aser asüng (Deobar) 'Thank God' indang cast tem den longjemtsü terenemba lir.

Iba film nung Ajay aser Sidharth Malhotra nati tongti shilem agiba angutsü aser tenati iba film tangok tenzüko. Actor anaprongla den Rakul-i tasembuba longjemer alitsü. Rakul-i 'De De Pyaar De' nung Ajay aser 'Aiyaary' o 'Marjaavaan' nung Sidharth den külemi shilem agiogo.

Taoba küm, lockdown nung kecha meinyaktet anogo/mapang timba süidaktsüba sülen, Rakul-i aritepa mapatem inyak tenzüko. December 2020 nung lai Arjun Kapoor den

külemi film ka tangokogo aser iba sülen, John Abraham indang 'Attack' maparen tembangtsüogo. Tesüiba hopta ishika tejakdang, la dak COVID-19 putetba sülen, mapang tatsüka lai shinga den

majurutepi quarantine asü, saka tang la taneptsü ngur sülen tanaben maparen tenzüko.

"Rakul dak Covid-19 negative tendangtetba sülen, lai tanaben wadang nung maparen tenzüko aser la dak aketba sempet sayutsü asoshi project tem nung inyaktsü tejangraba sayur. Hyderabad nung 'Mayday' tangokmar sülen, 'Thank God' tangoktsü atema la Mumbai tonga aruogo," ta sangdong ka ajanga metetdakttsü.

Tawa, BT den Covid-19 wara anema raraba dak sendakba nung interview ka agiba mapang, lai "Nü sasa naji anema aser tashiita lir ta amangba jagi taneptsü angutsü asoshi tongtibang shilem ka agir. Iba tebilemba nung ni teimla tulu yur anepalu. Tajung bilemba jagi asen dangi tajungji arur. Iba timtem atema ni mozü aika machi. Iba den külemi ni teti dang temang nung teyari agütsüba chiyongtsütem chia liasü," ta ashi.

Totzü jenjang atuba atema...

(tapak 7 nungi...)

Tangbo International crude oil barrel ka jenjangji taoba mapang dang nungi tesadang shi agi tajemba kümogo ajisüaka tanü Delhi nung petrol litre ka nung sen 85.70 aser diesel litre ka nung sen 75.88 kümogo," ta metetdakttsü.

Tesüiba küm trok ser tesadang nung Modi sorkari gari totzü nung saru tali atuba agi sen crore 20,00,000 tajangzüko

agiogo, ta Maken-i ashi. "T o n g t i b a n g t i b a tasüngdangbaji ya, sen lakh crore 20 ji kechii ao? Iba senji Modi'er capitalist tembartem ket-i ao asü. Congress-i sorkar dang nungi iba telangzübaji aginer," ta Maken-i ashi.

Tang Delhi nung petrol litre ka nung sen 85.70 aser diesel litre nung sen 75.88 kümogo. NDA sorkar maneni aija

Ajay Maken-i, Congress-i aniba UPA sorkar mapang nung sorkari nüburtem nem LPG cylinder 12 atema subsidy agüja liasü saka tangbo Modi sorkari ibaji agienogo, ta metetdakttsü.

Tang market nung LPG cylinder ka nung sen 700 shi lir (subsidy maden), ajisüaka UPA sorkar mapang nungbo cylinder ka nung sen 414 dang liasü ta pai ashi.

Thailand Open: Marin aser Axelsen nati takok angu

Aenjeti/January 24, 2020 (Agencies): Spain tsür Carolina Marin aser Denmark nung asayar Viktor Axelsen nati hopta asem tsüngdang Deobarnü Thailand Open badminton kija asaya tanabuba atonga kokogo. Deobarnü Bangkok nung tebur kija asaya nung Axelsen-i külem Denmark nung asayar Hans-Kristian Solberg Vittinghus akok aser Marin-i hopta asem tsüngda top seed Tai Tzu-ying anabenbuba final nung atonga kokogo.

Arishi küm 27 tain Marin-i asayamung ana nung game ka nung danga tamakok mongui Deobarnü final asaya tongtet. Taoba hopta dang nungi Deobarnü final asaya la asoshi tasakba liasü aser mezüngbuba game lai 21-19 agi akok.

Tanabuba game tetenzüklen Marin-i asaya amokbanger asaya aser Taiwanese tsürla ya la sasa dak tamang makai akümer ama reprangteta liasü. Tai-i asaya tatemlen match

points pezü tashi kümzüktet, ajisüaka menoatoker liasü aser lai asaya 21-17 agi makok.

"Ni kanga pelar. Hopta ana nung asayamung ana kokteta küm tenzükba ya jangrademtsüka lir. Ni kü sasa aser team dang 2021 küm yabo ni asayar balaka asütsü ta shir liasü," ta Marin-i ashi.

Tai-i ashiba agi, lai Marin den menepetpa masayatet. "Ni kūsasa mazüoktet aser unforced errors aika mena liasü," ta lai ashi.

Tebur kija asaya nung Axelsen-i mezüngbuba game 21-11 agi arishi küm 35 tain Vittinghus akok.

Vittinghus iba asayamung nung reserves list nungi shilem agi aser final tonga atutsü bilema mali asünung kidangi aotsü atema tayimtsü mekar aliba mapang melenshitsüsa aküm.

Asaya mapang timba ka Axelsen-i aziüoka asaya aser pai Vittinghus kanga mazüngi asemzükdaktsü.

Tanabuba game nung pai

21-7 agi asaya ayong ayonga koka asayamung tanabuba atonga akok

Tetsür tarep asaya Korea tsür tarep ana asaya aser jenjang trokbuba nung aliba tarep Kim So-yeong aser Kong Hee-yong nati Lee So-hee o Shin Seung-chan na 21-18, 21-19 agi koka liasü.

Tebur tarep asaya Taiwan nung Lee Yang aser Wang Chi-Lin nati Malaysia nung tarep Aaron Chia aser Soh Wooi Yik 21-13, 21-18 agi kokogo.

Maneni tarep temeyoktep asaya nung Thailand nung third seeds tarep Sapsiree Taerattanachai aser Dechapol Puavaranukroh nati Korea nung tarep Koreans Seo Seung-ae aser Chae Yujung na 21-16, 22-20 agi minute 46 nung akok.

Bodhbarnü Badminton World Federation World Tour Finals Impact Arena nung asayatsü aser iba asayamung ya temaba jenjang nung aliba team ti tokteptsü.

Hertha Berlin-i coach Labbadia & general manager mapanungi anentsü

Berlin, Aenjeti/January 24 (Agencies): Hertha Berlin-i coach Bruno Labbadia aser general manager Michael Preetz na Deobarnü mapa nungi anentsüogo. Sen aika intoka team yangluba sülena Bundesliga nung junga masayatetba sülen tena mapang nungi anentsü.

Labbadia-i Hertha coach ama ita teku inyakogo aser taoba küm ana tsüngda club toktsüba coach pezübuba kümogo. Honibarnü parnoki 4-1 agi Werder Bremen makokba sülen pa mapa nung anentsüogo aser Preetz-a general manager ama küm 12 jungnüa inyaker club toktsüogo.

Hertha pur Bundesliga nung jenjang 14buba nung lir aser relegation-i point ana agi dang mei lir, aser parnoki taoba league asaya ti nung ka dang koka lir.

Asaya 18 nungi point 17 dang ngutetba sülen onok jenjang kanga mejungi lir, ta mendenbuba Schmidt-i ashi. Anungji onoki coach melena tasa tasen benoktsü telemtetba agiogo. Onoki anogo ka ana tsüngda coach tasen shimba sangdongtsü, ta paisa

metetdaktsü.

Taoba mapang Germany aser United States national team coach Jrgen Klinsmann kübok asaya ter tashi mepetmesü nung asayaba sülen Labbadia ya 2020 küm April ita shim, saka takok mongutet.

2020 küm Europe nung sen aika intokba club tem rongnung Hertha-a densema liasü saka parnoki junga masayateti arudar. Champions League nung teti asayaba club ka küma yangertsü atema nükjidong yur liaka takok tajung mongutetba aser kasa mapang nung kasa yimti nungi sen ishika dang intokaka team yangluba Union Berlin pur jenjang 8buba nung aliba ngua parnok mesüngjemteter.

Investor Lars Windhorst-i senotsü teyari agütsüba sülen, Hertha-i taoba küm Milan nungi forwards Krzysztof Piatek, Leipzig nungi Matheus Cunha, Lyon nungi defensive midfielder Lucas Tousart aser Arsenal nungi loan nung midfielder Matteo Guendouzi anir aruba nung sen aika intokogo, ajisüaka parnok rongnung katidanga Berlin nung junga masayateti arudar.

A0 quarantine nung alir nisung 9 dak Covid-19 tashidak keta lir

Aenjeti/January 24, 2020 (Agencies): Australian Open metenzük tsüngda quarantine nung alir nisung ka dak tashidak poteter aliba tanaben asadangshiogo, ta ketdangsürtemi Deobarnü metetdaktsüogo aser tang Melbourne nung hotel tem nung munga aliba asayar aser support staff tem nisung teku dak COVID-19 tashidak poteta lir.

Health ketdangsürtemi taoba mapang ashiba agi, tashidak poteta alir kar dak "viral shedding" kuli jangjatsü atema bushitsüngdangdar.

COVID-19 Quarantine Victoria-ia, bendanglen menar aruba nisung ka dak tashidak potetba Deobarnü metetdaktsüogo, ajisüaka iba nisungba ya asayamung dak sendaka mali.

Australian Open quarantine hotels nung alir nisung 970

rongnung parnok timbaka joko tanabuba hopta quarantine nung lir aser Hokolbarnü tashi nungbo senzüsenpong sadema akümstsü.

Asayartem timba anogo nung ghonda 5 training agitsü temelaba agütsür lir saka tashidak potetba tayimtsü nung mena alir parnok 72 shi tang tashi pei takdang nungi mainshi kazüdar.

Mezüng osang agütsüba mapang asayar pezü dak tashidak potetogo ta metetdaktsü saka Spain tsür Paula Badosa kijai la dak tashidak potetba jangjatsüogo.

Badosa indang quarantine mapang la dak tashidak keta aliba potetba anogo nungi tenzük, tetezü la February 8 nungi tenzüksü aliba Australian Open asayamung atema renemshitsü mapang peria mangutsü.

Kasa mapang nung

quarantine nung aliba asayar Dayana Yastremska-i la nem tenokdangba agütsür aliba agintsütsü asoshi mepeshiba International Tennis Federation-i Deobarnü magizük.

January ita tenokdangba agütsür aliba mozü amshiba potetba sülen arishi küm 29 tain Ukrainian tsür la yagi iba taitsüba magizük aser lai Court of Arbitration for Sport nung ken o benoktettsü.

Australian Open dak sendaka aliba COVID-19 poteter alirtem parnok teku rongnung parnok asembo United Kingdom nung tashidak tapu tasen ka pokteter aliba mena lir ta ngutetogo.

Maneni Tournament director Craig Tiley-i Honibarnü shiti ka ajanga asayartem dang, tenokdangba agütsür aliba agintsütsüsa tensa aziüokteta mali, ta shiogo.

Rajasthan Royals-i director of cricket asütsü Sangakkara shim

New Delhi, Aenjeti/January 24 (Agencies): Indian Premier League franchise Rajasthan Royals-i Deobarnü taruba season atema Sri Lanka nung nungtugu asayar Kumar Sangakkara director of cricket asütsü shimogo

Sangakkara, shiba tang Marylebone Cricket Club (MCC) tir lir, pai coaching structure, auction plans aser team strategy, talent discovery aser development aser Nagpur nung Royals Academy terenlok densema club indang cricketing ecosystem ajak pai

achaayangtsü.

"Alima nung cricket asaya nung asayamung tongtibatiba rongnung ka nung franchise ka indang cricket strategy achaayangtsü aser tarutsü atema jenjang yanglutsütsü asoshi sentong yanglutsü maongka anguba ajanga ni kanga ajungmesor," ta Sangakarra-i ashi.

Sangakarra ya alima nung asayartem rongnung tajungtiba ka lir. Pai Sri Lanka tenüng nungi küm 16 asayaba mapang run 28,000 dak tema yanglua lir aser taoba küm 46

tsüngda asayartem ajak rongnung pa indang Test batting average timtiba asütsü.

Sanju Samson shibai Australia nung asayar Steve Smith ket nungi captain mapa belenzükogo, paa Sangakarra team nung adenba atema kanga pelar.

"Wicketkeeper tem rongnung tajungtiba ka densemba atema kanga pelar. Pai takok aika nguogo aser pa wicket-keeper-batsman tajung ka lir. Pa ya asayaba moapu aser kima nung yimya tajung sayuba nisung ka," ta Samson-i ashi.

India aser England Tests terepranger medeni asayatsü

Chennai, Aenjeti/January 24, 2021 (Agencies): India aser England tsüngda aruya aliba mezüng Tests series ana tashi MA Chidambaram Stadium nung terepranger medeni asayatsü, ta Hokolbarnü TNCA sangdong ka ajanga metetdaktsü.

Tamil Nadu Cricket Association (TNCA) secretary RS Ramasaamy-i ashiba agi, COVID-19 wara tensa süngjema makümba ajanga BCCI tetuyuba nung anidaka Tests asaya ana ya terepranger medeni ayongtsü.

"Coronavirus wara süshia maoba dak sendakba nung tekümdangtsü meratem agir ama Tests asaya ana atema terepranger memelatsü," ta Ramasaamy-i PTI dang ashi.

Iba dak sendakba nung, January 20,2021 nü sangdong ka ajanga TNCA züngsemtem dang terepranger medeni iba Test asayatsü asoshi BCCI den bangjemtepba metetdaktsüogo.

"COVID-19 wara India aser England tsüngda asadanger sülen, aruya aliba mezüng Tests asaya February 5, 2021 nü nungi tenzüksü.

asayartem akok tashi kümzüka yutsütsü asoshi BCCI-i tereprangertem medeni asayatsü telemtetba agiogo," ta sangdong nung shia lir.

"BCCI tetuyuba nung anidaka, February 5 aser February 17, 2021 nü MA Chidambaram stadium nung mezüng Tests asaya ana ya terepranger medeni (Spectators/Guests/Sub-Committee Members) ayonga asayatsü," ta kasa sangdong ajanga metetdaktsü.

Team anaprongla (India aser England) January 27 tashi nungbo Chennai tonga arutsü imlar aser temzüng agi melaba ama bio-bubble telungtet nung majemokdang, asayar ajak Covid-19 atema tendangtsü.

Tawa India Sorkar sangdong ka ajanga kima/moapu nung ayongba saisapongtem atema standard operating procedure tem nung anidaka terepranger shilem 50 tashi melatsü asoshi metetdaktsü.

BILEMDANGANG

"Alima nung abensaa metetba shinga mali."